

摘藻堂四庫全書薈要

集部

欽定四庫全書薈要

集部

淮海集卷一
四

一五



詳校官助教臣謝登雋

欽定四庫全書薈要

淮海集目錄

卷一

賦

卷二

古詩一

卷三

古詩二



卷四

古詩三

卷五

古詩四

卷六

古詩五

卷七

律詩一

卷八

律詩二

卷九

律詩三

卷十

絕句上

卷十一

絕句下

卷十二

進策一

卷十三

進策二

卷十四

進策三

卷十五

進策四

卷十六

進策五

卷十七

進策六

卷十八

進策七

卷十九

進論一

卷二十

進論二

卷二十一

進論三

卷二十二

進論四

卷二十三

論

卷二十四

傳

卷二十五

傳說

卷二十六

表上

卷二十七

表下

卷二十八

啓上

卷二十九

啓下

卷三十

簡

卷三十一

文上

卷三十二

文下

疏

卷三十三

誌銘

卷三十四

贊

跋上

卷三十五

跋下

卷三十六

狀

卷三十七

書

卷三十八

記

卷三十九

序

卷四十

挽詞

後集

卷一

詩一

卷二

詩二

卷三

詩三

卷四

詩四

卷五

雜文上

卷六

雜文下

長短句

卷上

二十二首

卷中

三十一首

卷下

二十三首

臣等謹案淮海集四十卷後集六卷長短句

三卷宋秦觀撰觀字少游高郵人以秘書省
正字通判杭州坐黨籍遠貶載宋史文苑傳
觀與兩弟覲覲皆知名於時而觀集獨傳宋
史本傳稱文麗而思深茗溪漁隱叢話載蘇
軾薦觀於王安石安石答書述葉致遠之言
以為清新婉麗有似鮑謝教陶孫詩評則謂
其詩如時女步春終傷婉弱元好問論詩絕

句因有女郎詩之譏今觀其集少年所作神
鋒太儁或有之槩以為靡曼之音則詆之太
甚呂本中童蒙訓曰少游雨砌墮危芳風櫺
納飛絮之類李公擇以為謝家兄弟不能過
也遊嶺以後詩高古嚴重自成一家與舊作
不同斯公論矣觀雷州詩八首後人誤編之
東坡集中不能辨則安得盡目以女郎詩乎
文獻通考別集類載淮海集三十卷又歌詞

類載淮海集一卷宋史則作四十卷今本卷數與宋史相同而多後集六卷長短句分為三卷蓋嘉靖中高郵張縉以黃瓚本及監本重為編次云乾隆四十三年二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷一萬五千二百十九

集部

淮海集卷一

宋 秦觀 撰

賦

浮山堰賦 并引

梁武帝天監十三年用魏降人王足計欲以淮水灌壽陽乃假太子右衛康絢節督卒二十萬作浮山堰於鍾離而淮流湍駛漂疾將合復潰或曰淮有蛟龍喜乘風

雨壞岸其性惡鐵絢以為然乃引東西冶鐵器數千萬斤益以薪石沉之猶踰年乃合堰袤九里水逆淮而上所蒙被甚廣魏人患之果徙壽陽戍頓八公山餘民分就岡壠未幾淮暴漲堰壞奔於海有聲如雷水之怪妖蔽流而下死者數十萬人初鎮星犯天江而堰實退舍而壞嗚呼異哉感而作浮山堰賦其詞曰

繫四瀆之並醜兮寔脉絡於坤靈惟長淮之淡漫兮自桐栢而發源貫江河以下驚兮拉四沂而左奔走獍雷

以赴海兮駕扶搖而薄山固元氣之宣節兮熄衆兆之
災患粵蕭梁之服命兮抗北魏以爭衡信降虜之詭計
兮阻湯湯而倒征依兩岸以受土兮羗合脊於中央捷
竹笛石之不足兮又沉鐵以厭不祥衰九里以中峙兮
截萬派之奔茫大隄屹乎如墉兮杞柳蕘其成行展源
深而支永兮雖蹙否而必通倏鯨吼以奔潰兮與蒼蒼
而俱東若燃犀之照渚兮旅百怪而爭道驛馬怒而噓
蹠兮虎蛟咆而相糾哀死者之數萬兮孤魂逝其焉游

背自然以司鑿兮固神禹之所惡世苟近以昧遠兮或不改其此度螳螂怒臂以當車兮飛衛銜石而填海僭梁人之不思兮卒取非於異代豈方迫於尋引兮不遑議夫無窮將姦臣取容以幸入兮公相援而欺蒙抑五材囚壯之有數兮特假手於憧憧系曰敦阜冠冥大川屯精氣扶輿變乾文運徒力頓漂無根潮波復故彌億年

黃樓賦

并引

太守蘇公守彭城之明年既治河決之變民以更生又
因脩繕其城作黃樓於東門之上以為水受制於土而
土之色黃故取名焉樓成使高郵秦觀賦之其詞曰

惟黃樓之瓌瑋兮冠雉堞之左方挾光晷以橫出兮
干雲氣而上征既要眇以有度兮又洞達而無旁斥丹
腹而不御兮爰取法乎中央列千山而環峙兮交二水
而旁奔岡陵奮其攫拏兮豁谷效其吐吞覽形勢之四
塞兮識諸雄之所存意天作以遺公兮慰平日之憂勤

繫大河之初決兮狂流漫而稽天御扶搖以東下兮紛
萬馬而爭前象罔出而侮人兮螭蜃過而垂涎微精誠
之所貫兮幾孤墉之不全偷朝夕以昧遠兮固前識之
所羞慮異日之或然兮復壓之以茲樓時不可以驟得
兮姑從容而浮游儻登臨之信美兮又何必乎故丘觴
酒醪以為壽兮旅穀核以為儀儼雲髻以侍側兮笑言
樂而忘時發哀彈與豪吹兮飛鳥起而參差悵所思之
遲暮兮綴明月而成詞噫變故之相詭兮道傳馬之更

馳昔何負而遑遽兮今何暇而遨嬉豈造物之莫詔兮
惟元元之自貽將苦逸之有數兮疇工拙之能為躓哲
人之知其故兮蹈夷險而皆宜視蚊虻之過前兮曾不
介乎心思正余冠之崔嵬兮服余佩之焜煌從公於斯
樓兮聊裴回以徜徉

子瞻謝詩 我坐黃樓上欲作黃樓詩忽得故人書
中有黃樓詞黃樓高十丈下建五丈旗楚山以為城
泗水以為池我詩無傑句萬景驕莫隨夫子獨何妙

金
五
四
人
卷
一
考
一
雨電散雷推雄辭雜今古中有屈宋資南山多磬石
清滑如流脂朱蠟為摹刻細妙分毫釐佳處未易識
當有來者知

寄老庵賦

或問孫先生之遊湯泉山也嘗於佛祠之旁二松之下
誅薙草茅平夷土塗規以為庵曰寄老焉予時實從與
見其事願揚摧而陳之僕曰唯唯寄老之區在於湯泉
實惟歷陽東城之域山林鬱其修阻水土婉而滋息風

和氣平物無癘疫其出遊也南則峰巒經亘二百餘里
前望建業之都却顧項王之亭龍窟呀其旁出江漫漫
而徂征東則惠濟真相二刹相望殿寢中開四注脩廊
閒從遊子於焉相羊沈燎茗飲樂未渠央西則赭落之
前三井天出幽瑟白浪明晦如一旁輸有斛上庇有室
解衣入遊百疾為失止則瓦梁之河陰陵之澤水潦之
所聚會魚鼈之所充斥芟菱蒲蓴毛髮之富被及鄰國
其人居也則閉關却掃反聽收視內外既進與妙自會

湛乎若玉淵之澄朽然如槁木之廢其游也其居也無所適而非道者世奚足以識之哉雖然先生方為侍從之臣充諫諍之官論思獻納日不遑給雖欲復從二子於寄老之上未可得也一旦功成事畢引老乞身天子憫之不煩以政公卿大夫設祖道供帳於國門之外酒闋升車望寄老而歸焉則僕也亦將負杖屨而從之矣

湯泉賦

大江之濱東城之野有泉出焉直回峰負深谷分埒引
源迤邐相屬晨夜有聲涵雲注玉薄為虎鬚狀為魚目
鱗介莫潛遇者斯浴此何水也哉野老告余曰泓泓洎
洎莫虞歲年不火而煥其名湯泉嗚呼豈非熒惑蒞於
上耶燭龍隱於中耶旁通咸池日御之所經耶幽精沈
魄陰償其負耶丹砂黃硫金石之氣酷悍之所激耶德
有常仁惠公而浹寒凝海兮不冰旱焦山兮不竭其或
燥濕外干精氣散越皮膚革瘡瘍僊筋淫血欣滯汨之慙

游悅幽憂之永脫以沐則髮澤以頰則膚悅其羨流冗
浸捐棄於溝壑者猶能灌蔬稻之畦已牛馬之喝此又
何其然耶吾聞天下之水厥類寔繁至於弱水儲陰投
羽必沈火井萃陽爛石灼金祥標醴泉病飲而瘳異紀
滋穴神瀆以流焦溪乏胃蔓之飾沸渾謝聳聑之游其
餘酒墨所發膠鹽是滋啜懷千金飲狂一國裒玉乳以
中涵橫金絲而徑度詭品繆名紛莫為數咸受命於元
精亦各私其所遇若夫匡廬汝水之旁尉氏驪山之下

烟菲掩禱王孫鳥隼之所娛金穴椒房專寵靡曼之所
占則湯泉之中又有顯晦者焉野老羶然而笑曰善乎
齊給之士曳杖而去行歌於塗曰淖沸滂沱奮此泉兮
被彼山阿吾唯盥沐兮不知其他

子瞻跋云余之所聞湯泉七其五則今三子之所遊
與太虛之所賦所謂匡廬汝水尉氏驪山其二則余
之所見鳳翔之駱谷與渝州之陳氏山居也皆棄於
窮山之中山僧野人之所浴麋鹿猿獠之所飲惟驪

山當往來之衝華堂玉甃獨為勝絕然坐明皇之累
為楊李祿山所汙使口舌之士援筆唾罵以為亡國
之餘辱孰甚焉今惠濟之泉獨為三子者詠嘆如此
豈非所寄僻遠不為當塗者所溷而為高人逸才與
世異趣者之所樂乎或曰明皇之累楊李祿山之汙
泉豈知汙之然則幽遠僻陋之歎亦非泉所病也泉
固無所榮辱特以人意推之可以為抱器適用而不
擇所處者之戒元豐元年十月五日

歎二鶴賦

廣陵郡宅之圃有二鶴焉昂然如人處乎幽閒翅翮摧
傷而弗能飛翻雖雄雌之相從常悒悒其鮮惟時引吭
而哀唳若對客而永嘆圃吏告予曰此紫微錢公之鶴
也公熙寧時實守此邦心虛一而體道治清淨而忘言
既不耽乎豆觴又不嗜乎匏絃惟此二鶴與之周旋居
則俛仰於賓掾之後出則飛鳴乎導從之先故鶴之來
也則知使君之將至鶴之往也則知使君之將還是時

一郡之人好甚於姻敬愈於客如愛子之居家若寵臣
之在國畫從乎風亭之濱夜棲乎月臺之側謂此幸之
可常頗逍搖而自得逮公之去於今幾時人各有好鶴
誰汝私具名物於有司鷄鶩易而侮之傍軒楹而蒙叱
歷階所而遭麾惟主人之故客間一遇而嗟咨余聞而
嘆曰噫嘻有恃而生者失其所恃則悲彼有啄乎廣莫
之野飲於清泠之淵隨林丘而止息順風氣而騰騫一
鳴九臯聲聞於天若然者又豈衛侯之能好而支遁之

可憐哉

郭子儀單騎見虜賊

回紇入寇汾陽出征何單騎以見虜蓋臨戎而示情匹
馬雄趨方傳呼而免胄諸羗駭矚俄下拜以投兵方其
唐祚中微胡塵內侮承范陽猖獗之亂值永泰因循之
主金繒不足以塞其貪嗜鎧仗不足以止其攘取雲屯
三輔但分諸將之兵烏合萬羣難破重圍之虜子儀乃
外弛嚴備中輸至誠氣干霄而直上身按轡以徐行於

是露刃者膽喪控弦者骨驚謂令公尚臨於金甲想可
汗未厭於寰瀛頓釋前憾來尋舊盟彼何人斯忽去幢
幡之盛果吾父也敢論戈甲之精豈非事方急則宜有
異謀軍既孤則難拘常法遭彼虜之悍勁屬我師之困
乏校之力則理必敗露示以誠則意當親狎所以徹衛
四環去兵兩夾雖鋒無鏌邪之銳而勢有泰山之壓據
鞍以出若乘擒虎之驄失杖而驚如棄華元之甲金石
至堅也以誠可動天地至大也以誠可聞矧爾熊羆之

屬困乎蛇豕之羣於是時也將乘驕而必敗兵不戢則
將焚惟有明信乃成茂勲吐蕃由是而引歸師殲靈夏
僕固於焉而暴卒禍息并汾非不知猛虎無助也受侮
於狐狸神龍失水也見侵於螻蟻曷為鋒鏑之交下遽
遺紀綱而不以蓋念至威無恃於張皇大智不資於恢
詭遠同光武輕行銅馬之營近類曹成獨造國良之壘
向若怨結不解禍連未央養威嚴於將軍之幕角技巧
於勇士之場攻且攻兮天變色戰復戰兮星動芒如此

則雖驍雄而必弊顧創病以何長苻秦夸南伐之師坐
投肥水新室恃北來之衆立潰昆陽固知精擊刺者非
為將之良敢殺伐者非用兵之至況德善之身積宜福
祥之天畀故中書二十四考焉由此而致

和淵明歸去來辭

歸去來兮眷眷懷歸今得歸念我生之多艱心知免而
猶悲天風飄兮余迎海月炯兮余追省已空之憂患疑
是夢而復非及我家於中途兒女欣而牽衣望松楸而

長慟悲心極而更微升沉幾何歲月如奔嗟我宿昔通
籍壁門賜金錐盡給札尚存愧此散木繆為犧尊屬黨
論之云興雷霆發乎威顏淮南謫於天庖予小子其何
安歲七官而五譴越鬼門之幽闕化猿鶴之有日詎國
光之復觀忽大明之生東釋纍囚而北還醜天漢而一
洗覺宇宙之隨寬歸去來兮請逍遙於至遊內取足於
一身復從物兮何求榮莫榮於不辱樂莫樂於無憂鄉
人告予以有年黍稷鬱乎盈疇止有弊廬泛有扁舟濯

予足兮寒泉振予衣兮古丘洞骨中之滯礙眇雲散而
風流識此行之匪禍乃造物之餘休已矣哉桔槔俛仰
無已時舉觴自屬聊淹留汝今不已將安之封侯已絕
念仙事亦難期依先塋而灑掃從稚子而耘耔脩杜康
之廢祠補由庚之亡詩為太平之幸老幅巾待盡更奚
疑

淮海集卷一

欽定四庫全書蒼要卷一萬五千二百二十

集部

淮海集卷二

宋 秦觀 撰

五言古詩

泊吳興觀音院

金刹負城闔閭然美栖止卞山直穹窿若水相依倚霜
檜鬱冥冥海棕鮮嶷嶷廣除庇夏陰飛棟明朝晷溪光
鳧鶩邊天色菰蒲裏緒風傳晝焚壁月窺夜禮洩雲羣

層空規荷鑑幽吐舩腥烟際下鐘磬林端起聲牙戲清
深嶽峯撲空紫所遇信悠然此生如寄耳志士恥溝瀆
征夫念桑梓攬衣軒楹間嘯歌何窮已

三老堂

趙少師張少
保趙通議

堂堂三元老業履冠儔匹謬橫秋霜高明麗朝日竝
道謁溫宣連科收甲乙東南奠藩服西北馳使驛解鞅
環堵安岸幘羶裘屈羣姦懾聲效衆廢起吐叱至今領
麾地謳吟遍蓬華出入雖異途歸潔固如一晚厭方內

遊把袂訪閒逸雲壑慶安車風川駛飛鷁獻酬埃壻外
珠玉在揮筆風標傲松鶴顏髮移丹漆遂令吳越人藻
繪恣稱述邈然超世姿髣髴得十七辟龐禮寂滅麟閣
事蕭瑟茲焉出民願名實更炳蔚琬琰琢高詞龍蘭燎
深室福履既所綏光華無終畢

送僧歸遂州

寶師本巴蜀浪跡遊淮海定水湛虛明戒珠炯圓彩飄
零鄉縣異晚晚星霜改明發又西征孤帆破烟靄

送周裕之赴新息令

丈人淮海英抗節浮雲外揮毫錯星錦抵掌參筭籟青
春抱脩能脫略無范蔡晚營三徑資百里聊束帶扁舟
歲欲徂古剝夜仍艾去去整羽儀行與高風會

寄曾逢原

孟夏氣候好林塘媚晴輝回渠轉清流藻荇相因依叢
薄起踈籟衆鳥鳴且飛高城帶落日光景酣夕霏即事
遠興託撫已幽思微逍搖弄柔翰徒倚絃金徽美人邈

雲眇志願固有違丹青儻不逾與子同裳衣

司馬遷

子長少不羈發軔遍丘壑晚遭李陵禍憤悱思遠託高
辭振幽光直筆誅隱惡馳騁數千載貫穿百家作至今
青簡上文彩炳金牘高才忽小疵難用常情度譬彼海
運鵬豈復顧繒繳區區班叔皮未易議疎略

田居四首

鷄號四鄰起結束赴中原戒婦預為忝呼兒隨掩門犁

鋤帶晨景道路更笑喧宿潦濯芒屨野芳簪髻根霽色
披宵靄春空正鮮繁辛夷茂橫阜錦雉嬌空園少壯已
雲趨伶俜尚鴟蹲解蟹黃經雨潤野馬從風奔村落次第
集隔塍致寒暄眷言月占好努力競晨昏

入夏桑柘稠陰陰翳虛落新麥已登場餘蠶猶占箔隆
曦破曾陰霽靄收遠壑雌蜺卧淪漪鮮颺泛藜薄林深
鳥更鳴水漫魚知樂羸老厭煩歆解衣屢盤礴蔭樹濯
涼颺起行遺帶索冢婦餉初還丁男耘有託倒筒備青

錢鹽茗恐垂橐明日輸絹租鄰兒入城郭

昔我蒔青秧廉纖屬梅雨及茲欲成穗已復頽星暑遲
暮易昏晨搖落多砧杵村迥少過從客來旋炊黍興發
即杖藜未嘗先處所褰裳涉淺瀨矯首沒孤羽藁祠土
鼓悲野埭鷓鴣雞舞雉子隨販夫老翁拜巫女辛勤

一作艱難

稼穡事惻愴田疇語得穀不敢儲催科吏傍午

嚴冬百草枯鄰曲富休暇土井時一汲柴車久停駕寥
寥場圃空跼跼烏鳶下孤榜傍橫塘喧春起旁舍田家

重農隙翁姬相邀迓班生醜酒醪一行三四謝陶盤奉
旨蓄竹筍羞雞炙飲酣更獻酬語闌或悲咤悠悠燈火
暗刺刺風颺射客散靜柴門星蟾耿寒夜

富疑
作當

寄題傅欽之草堂

河陽有洑流經營太行根盛德不終晦發為清濟源斯
堂濟源上太行正當門仰視浮雲作俯窺流水奔修竹
帶藩籬百禽鳴朝暎相望有盤谷李愿故居存主人國
之老實惟商巖孫班行昔供奉亟進逆耳言天子色為

動羣公聲亦吞蕭條冰霜際不改白玉温出處士所重
其微難具論公勿思草堂朝廷待公尊

次韻酬徐仲車見寄

渭清非勝涇蘭芳本無慕我生季葉中乃與古人遇
當供洒掃匏繫愧遲暮來章感存沒三讀淚如注

次韻邢敦夫秋懷十首

以微雲淡河漢疎
雨滴梧桐為韻

驅車陟高丘却望大梁圻馳道入雙闕勾陳連太微
夷門壯下屬清洛相因依美哉吾黨士卑高良可希

暮有二客至俱以能禪聞一枝惠林出一派智海分言
各不相可往來劇絲棼謝客姑舍是妨余醉看雲

昔者曾中書門戶實難瞰筆勢如長淮初源可觴濫經
營終入海欲語焉能暫斯人今則忘悲歌風慘愴

渤海有巨鼇其顛冠崖我宿昔嘗小拊八絃相盪摩忽
遭龍伯人一舉空潮波取皮煎作膠清此崑崙河

蝮蛇初螫手壯士斷其腕豈不悲毀傷所卹在軀榦西
羗沙鹵地置戍或煩漢雞肋不足云阿瞞妙思筭

湯湯辟靡流中有學子居但說若稽古言猶三萬餘來
者轉相祖詞林日凋疎稍喜績溪令入校天祿書

匠氏構明堂百材入斤斧儻非豫章棟冗長亦焉取英
英范與蘇器識兼文武胡為先一州不用作霖雨

憬彼高句麗來修裔夷職天都富如海勞汝送涓滴舳
艫尾相銜遠近困供億止沸當絕薪揚湯百無益

祖宗舉賢良充富多名儒執事惡言者此科為之無雖
有仲舒錯或橫江潭魚果欲鳴鳳至還當種椅梧

邢侯秋卧病揮毫見深衷賡者二三子翕然笙磬同不
為兒女姿頗形四方風屬有山水念因之絲與桐

春日雜興十首

飄忽星氣徂青陽迫遲暮鳴飛各有適赤白紛無數雨
砌墮危芳風軒納飛絮褰幃香霧橫岸幘雲峰度林影
舞窻扉池光染衣屨參差花鳥期蹭蹬琴觴趣撫事動
幽尋感時遺近慕秣馬膏余車行行不周路

結髮謝外好僂俛希前修繆挾江海志耻為升斗謀齷

歷難刻畫賤貧多釁尤發軔背伊闕解驂憇邗溝丹鉛
費永晷麴糵毆深愁壁月鑒簾櫳珠星絡梧楸泯泯渠
水駛霏霏花霧浮公子悵何許撫膺徒離憂

潭潭故邑井猗猗上宮蘭不食自清潔莫服更幽閒志
士耻弱植卷跡甘饑寒佳晨追良覲觸物懸悲端川途
眇回遠經歲曠音翰豈不慕裘馬詭得非所安蟬冕多
怵迫繩樞尠憂患枉尋竟何補方枘誠獨難

吳會雖褊小海濱富奇峰天雞一號叫劔戟明遙空谿

谷相徑復深林杳攢叢猿吟虎豹啼雲氣迷西東中有
遯世士超然悶孤蹤被蘭服明月起坐松聲中夜鍛吸
沆瀣朝琴庇青葱騎星友元氣巢許安可同俛躬區中
人飛埃集毛鋒問津或不繆從子游鴻蒙

東方有美人容華茂春粲抱影守單棲含睇理哀彈聲
意一何切斲歡邈雲漢徒然事膏沐孰與徂昏旦微誠
浪自持嘉月忽復晏巧轉度虛櫺飛紅觸幽幔歲歲芳
草滋夜夜明星爛合并會有時索居不必歎

寢瘵倦文史，駕言從遨嬉。
颶風舉遙溆，規日麗清漪。
含桃粲朱實，杜若懷碧滋。
娉娉弱絮墮，圍圍文魴馳。
明霞廓遠矚，哀禽攪離思。
縟草天際合，孤雲川上移。
寬閒絕輪鞅，重複多路歧。
信美難久佇，歸歟從所治。

昔我遊京室，交通五陵間。
主客各英妙，袍馬相追攀。
千金具飲啜，百金顧吹彈。
纓弁羅廣席，當頭舞交竿。
鮮粧耀淥酒，采纈生風瀾。
燈燭暗夜艾，士女紛相班。
歡娛曷徂歇，轉盼如飛翰。
亶亶負孤願，離離銜永歡。
山鳥窺茗

飲簷花笑蔬飧棄捐勿重陳事定須蓋棺

客從遠方來遺我昭華管吹之動人心異境生虛窾
礫青嶂橫泱泱春溜漸馬蹄交狹邪車轂錯平坦士女
競芳辰禽魚蔭修竿依微認睇笑凌沒見纖短停吹歛
泯滅耿耿復空館靈物信所珍顧恨知音罕

桃李用事辰鮮明奪雲綺繁華一朝去默默慚杞梓時
但鷹化鳩地遷橘為枳獨有羨門生後天猶不死

猶一作常

藝籍燔祖龍斯文就淪喪帝矜黔首愚諸雋

一作雄

出相

望揚馬操宏綱韓柳激頽浪建安妙謳吟風槩亦超放
玉繩帶華月艷艷青冥上奕世希末光經緯得無妄兒
曹獨何事詆斥幾覆醬原心良自誣猥欲私所尚螳螂
拒飛轍精衛填溟漲吐吐徒爾為東海固無恙鷓鴣日
彫滅黃口紛冗長投袂睇層霄茲懷誰與亮

和孫莘老題召伯斗野亭

淮海破冬仲雪霜滋不平菱荷枯折盡積水寒更清輟
棹得佳觀湖天繞朱甍信美無與娛濁醪聊自傾北眺

桑梓國悠然白雲生南望古邗溝滄波帶蕪城村墟翳
茅竹孤烟起晨烹簷間鳥聲落客子念當行攬衣視日
景薄陰漏微明何時復來遊春風發鮮榮

孫莘老原唱 淮海無林丘曠澤千里平一渠閑防
渚物色故不清老僧喜穿竹北戶延朱甍簷楯斗杓
落簾幃河漢傾平湖杳無涯湛湛春波生結纜嗟已
晚不見芙蓉城尚想紫茱盤明珠出新烹平生有微
尚一舟聊寄行遇勝輒偃蹇霜鬚刷澄明可待齒牙

豁歸歎謝浮雲

黃魯直和 謝公所築埭未歎曲池平蘇州來賦詩
句與秋氣清結構擅空闊湖光浮棟甍維斗天司南
其下百瀆傾具宮產明月含澤遍諸生盤薄淮海間
風烟浸十城籟簫吹木末浪波沸庖烹我來抄搖落
霜清見魚行白鷗遠飛回得我若眼明佳人歸何時
解衣繞廂榮

蘇子瞻和 落帆謝公渚日脚東西平孤亭得心慙

暮景含餘清坐待斗與牛
錯落掛南甍老僧如宿昔
一笑意已傾新詩出故人
舊事疑前生吾生七往來
送老海上城逢人輒自哂
得魚不忍烹似聞績溪老
復作東都行小詩如秋菊
艷艷霜中明過此感我言
長篇發春榮

蘇子由和 扁舟未得解坐待兩闌平濁水汗人思

野寺為我清昔遊有遺詠
枯墨存高甍故人獨未來
一樽誰與傾北風吹微雲
暮寒依月生前望邗溝路

却指鐵甕城茅簷卜茲地江水供晨烹試問東坡翁
畢老幾此行奔馳力不足隱約性愈明早為歸耕計
免慙老僧榮

張琬和

維舟得古寺望遠天四平晴日揮揮散晚

風冷冷清危亭下瞰野層閣高連甍起望斗與牛淮
海相奔傾往來誰百年今昔我平生悠悠何所寓臺
上多化城與其逐影死寧似不鳴烹吐哉應有止老
矣將安行中庭桂子落丈室霜月明此意竟蕭條猶

然笑安榮

張芸叟和

我登甘棠埭所向殊未平舟行汙池中

頓失江湖清蛙聲亂僧喞鷓吻赫市覺意同伯喈死
苟與衛士傾開池種白蓮壘石擬三生尤淹南斗墟
終遠北斗城設我紫藕供報之白芽烹三年猿鶴友
萬里秦梵行秋風隴首至落日淮南明寄言懷土士
慎勿慕官榮

淮海集卷二

欽定四庫全書會要卷一萬五千二百二十一

集部

淮海集卷三

宋 秦觀 撰

五言古詩

陪彥瞻遊金山和子由詩

江流會楊子洶洶東南驚海門
劃前開金山屹中據鼓鐘食萬指
金腹棲千柱夜庭遊月波曉觀搏香霧
天清猿鳥哀風暗魚龍怒雲物橫古今
濤波閱晨暮三州氣

色來上下端倪露偉哉元氣間此勝知誰聚念昔憇精
廬登臨輒忘去汲新試團月飯素羹魁芋妙興入芳籐
真境在芒屨別來星晷換寤寐經從處忽蒙珠璧投了
與雲巒遇幽光炯肝肺爽氣森庭戶區中多滯念方外
饒竒趣寄語山阿人冷然行復御

子由原唱 揚州望金山隱隱大如幘榻來長江上
孤高二千尺僧居厭山小面面貼蒼石虛樓三百間
正壓江湖白清風斂霽霧曉日曜金碧直侵魚龍居

似有鬼神役我行有程度欲去空自惜風吹渡江水
山僧午方食波瀾洗我心笋蕨飽我腹平生足遊衍
壯觀此云極鐵甕本誰安海門復誰植東南遮隱見
遙與此山足茲遊幾不遂深愧幕府客歸時日已暮
正值江月黑顧視天水并坐恐星斗濕使君何時罷
登覽不可失

鮮于子駿和 蓬萊二神山橫絕倚鼇背鼇傾海水
動一峰失所在飛來大江心盤礴幾千載化為金僊

居龍象錯朱貝夙昔愛山水江湖不暫亡君前或剖
竹匏繫古維揚隱然勝絕境旦旦遇相望不意二君
子招攜一葦航高攀躡雪梯潤視瞰冥漲潮來隱天
地萬里卷白浪波清霄漢淨澄澈迷下上更深月正
中山影杳無象蛟鼉四面穴形勢三州壯融結既難
窮丹青殊莫狀蘇侯韻高遠邵子雅趨尚竒觀極無
邊幽尋端未放浮生閱流水清話造方丈畢景趣言
歸侵心搖兩漿武功真好竒落筆掃珠璣持語淮南

守茲遊不可遺君思早晚東南下一棹扁舟信所之
同子瞻端午日遊諸寺賦得深字

太史抱孤韻暢懷在登臨別乘慙鄒枚佳辰事幽尋參
差水石瘦窅窕房櫳深清磬發疎箔妙香橫素襟復登
窄堵坡環回矚嶽峯雙溪貫城郭暝色帶孤禽涼颺動
爽籟薄雨生微陰塵想淡清漣牢愁洗芳斟揮筴訂往
古援毫示來今悔無刻燭敏續此金玉音

子瞻詩 肩輿任所適遇勝輒留連焚香引幽步酌

茗開淨筵微雨止還作小窻幽更妍
盆山不見日草木自蒼然
忽登最高塔眼界窮大千
卞峰照城郭震澤浮雲天
深沈既可喜曠蕩亦所便
幽尋未云畢墟落生晚烟
歸來紀所歷耿耿清不眠
道人亦未寢孤燈同夜禪

寄陳季常

一鈎五十牯始具任公釣
揭竿趣灌瀆與爾不同調
先生本西蜀俠氣見英妙
哀憐世間兒細黠似黃鶴
侍童

雙擢玉鬢髮光可照駿馬錦障泥相隨窮海嶠平生携
手好十七登廊廟小生相吏耶徒枉尺書召暮年更折
節學佛得心要鬻馬放阿樊幅巾對沈燎冷冷屋外泉
兀兀原頭燒欲知山中樂萬古同一笑

同子瞻參寥遊惠山

輟棹縱幽討籃輿入青蒼圓頂相邀迓旃檀燎深堂層
巒淡如洗傑閣森欲翔林芳含雨滋岫日隔林光涓涓
續清溜靡靡傳幽香俯仰佳覽眺悠哉身世忘

金
五
日
人
卷
三
三
使君厭機械所與惟散人顧慙蒹葭陋繆倚瓊枝新上
干青礧礧下屬白磷磷洞天不知老金界無棲塵緬彼
人間世烏蟾閱青旻詎得踵三隱山阿相與鄰

樓觀相複重邈然閎深樾九龍吐清冷灑灑曾未絕瞿
乍馳千里真珠猶不滅況復從茶僊茲焉試葵月岸巾
塵想消散策佳興發何以慰遨嬉操觚繼前轍

子瞻云余昔為錢塘倅往來無錫未嘗不至惠山既
去五年復為湖州與高郵秦少游杭僧參寥同至覽

唐處士王陵竇羣朱宿所賦詩愛其語清簡蕭然有
出塵之姿追用其韻各賦一首

夢裏五年過覺來雙鬢蒼還將塵土足一步漪瀾堂
俯窺松桂影仰見鵲鶴翔炯然肝肺間已作冰玉光
虛明中有色清淨自生香還從世俗去永與世俗忘

又

薄雲不遮山疎雨不濕人蕭蕭松桂滑策策芒鞋新
嘉我二三子皎然無溜磷勝遊豈殊昔清句仍絕塵

金
卷三
弔古泣舊史疾讒歌小旻哀哉扶風子難與巢許鄰

又

敲火發山泉烹茶避林樾明窻傾紫盞色味兩竒絕
吾生眠食耳一飽萬想滅頗笑玉川子饑弄三百月
豈如山中人睡起山花發一甌誰與共門外無來轍

參寥詩

山烟弄滅沒山木含葱蒼刺舟傍遙岸理策升虛堂
周遭矚層巘矯矯如翱翔下瞰平田流澹然浮日光

青篁解初籜洗雨聞新香雖云迫前途真賞豈易忘

又

松門暗朝雨寂歷無行人蔓草忽穿徑卉木鬱以新
堦泉漱石齒照眼光磷磷史君美無度卓犖遺囂塵
風標傲竹栢談笑凌霄旻何愧沈冥子卧霞吞結鄰

又

揚帆渡江來洗眼驚翠樾雲姿既容裔鳥弄更清絕
凌梯訪前蹤琬琰亦未滅嗟我魚目光疇能綴明月

狂墨掃琅玕風烟座中發殊勝區中人茫茫走飛轍
送少章弟赴仁和主簿

我宗本江南為將門列戟中葉徙淮海不仕但潛德先
祖實起家先君始逢掖議郎為名士余亦忝詞客風流
以及汝三通桂堂籍汝弱不好弄文章有新格久從先
生遊術業良未測武林一都會山水富南國下有賢別
駕上有明方伯干將入砥礪驀裏就銜勒勿矜孔鸞姿
不樂棲枳棘吳中多高士往往寄老釋辯才雖物化參

寥猶夙昔投閒數訪之可得三友益少來輕別離老去
重乖隔念汝遠行役惘惘意不懌道山雖云佳久寓有
饑色功名已絕意政苦婚嫁迫終從大夫議稅駕邗溝
側追蹤漢兩疎父子老阡陌

送李端叔從辟中山

人畏朔風聲我聞獨寬懷豈不知凜冽為自中山來端
叔天下士淹留蹇無成去從中山辟良亦慰平生與君
英妙時俠氣上參天孰云行半百身世各茫然當時兒

戲念今日已灰死著書如結菴聊以忘憂耳駸駸歲道
盡淮海歸無期功名良獨難雖成定奚為念君遠行役
中夜憂反側攬衣起成章贈以當馬策

贈蹇法師翊之

天都九經緯人物如紡績豈無仙聖遊但未見高識蹇
師蜀方士鬼物克服役竭來長安城摩挲金銅狄大蛇
死以論葛陂囚且釋是事何足云聊爾恤艱厄方從馬
明生西去鍊金液丹成得度世造化為莫逆予亦江海

人名宦偶牽迫投劾去未能見師三歎息

送劉貢父舍人

虎去藜藿採珠在其川媚君子一誣信實繫天下事念
昔元豐間公初謫南裔託詞弔湘水聞者為心醉踰年
儉臣逐國老起相繼除公守襄陽士始有生意茲焉歸
法從乃是朝廷計在公何足云事業本餘棄掖垣美花
木入直春正麗同僚看家風立馬揮九制

觀也本諸生早與世參商方桷不量鑿交親指為狂末

路辱公知賜出非所望相期古人處豈止事文章汝南
雖與區校官寔始張解鞅百無有栖栖寄僧坊築室從
有徒皆公借餘光一壺千金直所濟在倉黃萬里猶比
鄰別離無足傷何以報公德修好以為常

南京妙峰亭

王勝之所作
蘇子瞻題榜

王公厭承明出守南宮鑰結構得崇丘巋然瞰清洛是
時謫仙人發軔自廬霍郊原春鳥鳴來此動豪酌報投
一何富玉按金刀錯新榜揭中楹千載見遠託竭來訪

陳迹物色屬搖落人烟隔鳧鴈田疇帶城郭紅蕖隕風
漪砂礫卷飛籜青青陵上姿獨汝森自若人生如博奕
得喪難前約金鉞初控頤已復東方作大明昇中天龍
鸞入階閣深懲漁奪弊法令一刊削斯民如解懸喜氣
鬱磅礴公乎數登覽行矣翔寥廓

次韻奉酬丹元先生

金華紫烟客來作牧羊兒至言初無文尋繹自成詩二
景入妙解元氣含烟詞憐我鬣蒼浪黃埃眩蟲絲勸解

冠上纓一濯含風漪攝身列缺外倒躡蜿蜒鬢維斗錯
明珠望舒耿脩眉真遊無疆界浩蕩天風吹

送裴仲謨

君子出於德妙高如匠石但見廣廈成不見斧斤迹厚
為諸兄奉自奉頗云嗇三生陽亢宗薄俗有慙色汝南
古佳郡月旦評一易爾來似揚州不辨龍蜥蜴短簿髯
叅軍喜怒移頃刻正平竟獲免寔我文舉力念公多乖
隔憂思如紡績恥為兒女仁到此淚橫臆熙朝大烹飪

賢者不家食朝為郡縣吏暮作臺省客矧聞諸法從久
欲薦言責去去勿重陳九萬自此擊

題雙松寄陳季常

遙聞連理松託根黃麻城枝枝相鈎帶葉葉同死生雖
云金石姿未免兒女情相應風月夕滿庭合歡聲

徐仲車食於學官吏或以為不可欲罷去之太守
不聽禮遇如初感之而作

許丞老病聾督郵白欲廢賢哉黃次公鑒裁實精詣殷

勤謝督郵此丞乃廉吏重聽庸何傷善助無失意古人
骨已朽來者復誰繼仲車天下士固非許丞類至行通
神明問學有根柢若克老更聘自革風俗弊太守前已
聞粟帛俄見賜奈何少年子輒效督郵事道喪賢哲窮
聞之為流涕人心如其面難以一律揆所望在次公督
郵何足議

淮海集卷三

欽定四庫全書薈要卷一萬五千二百二十二

集部

淮海集卷四

宋 秦觀 撰

五言古詩

次韻夏侯冲秀才

儒官飽閒散室若僧房靜北窻腹便便支枕看斗柄或
時得名酒亭午猶中聖醒來復何事秉筆賦秋興焉知
懶是真但覺貧非病茫茫流水意會有知音聽鐘鼎與

山林人生各天性

送張和叔兼簡黃魯直

汝南如一器百千聚飛蚊終然鼓狂鬧啾啾竟誰聞議
郎盛德後清脩繼先芬未試霹靂手低回從此君學官
冷於水蠶鹽度朝曛間蒙相煖熱破憂發孤欣君今又
復去冀北遂空羣豈無一樽酒誰與通殷勤大梁多豪
英故人滿青雲為謝黃叔度鬢毛今白紛

和王忠玉提刑

嵩峰何其高峰高氣尤清念昔秋欲老從公峰下行古
木上參天哀禽報新晴脩塗雲外轉槁葉風中零曛黑
度伊水眇然古今情黎明出龍門山川莽難名信美非
吾土顧瞻懷楚萍美人天一方傷哉誰目成黃綬我聊
爾白鷗公勿驚糟醕可鋪啜古人忌偏醒

飲酒詩

我觀人間世無如醉中真虛空為消隕况乃百憂身惜
哉知此晚坐令華髮新聖人難驟得得且致賢人

左手持蟹螯舉觴屬雲漢天生此神物為我洗憂患
山川同恍惚魚鳥共蕭散客至壺自傾欲去不容間

客從南方來酌我一甌茗我酌初不啜彊啜且復醒既
鑿渾沌氏遂出華胥境操戈逐儒生舉觴還酌酊氏一作寢

雷觴淡如水經年不濡脣爰有擾龍系為造英靈春英
靈韻何高蒲萄難為鄰他年血食汝應配杜康神

艇齋并序

予以典校史領俸錢塘邂逅得友丁君彥良於陳留官

舍彥良年少氣雋誦詩文亶亶不休動有過人語深恨
得之晚也臨分以艇齋詩速予賦為寄題一篇
平生樂漁釣放浪江湖間兀兀寄幽艇不憂浪如山聞
君城郭居左右羣書環有齋亦名艇何時許追攀釣古
不釣今所得孔與顏不然如爾祖跨鶴出塵寰

和裴仲謨摘白鬚行

仲將題凌雲比訖鬚盡白陸展媚側室星星染為黑人
生如寄耳況復形與色澤壑藏山舟夜牛輸有力龐眉

三不遇已矣何所惜二毛賦秋興自愛頗姑息聞諸古
竺乾毛髮因地得數窮反其本螻蝻得而食妙年光可
鑿炯若鴉羽戢映梳漸蕭蕭變化了無隙所以梵志云
昔人已非昔皤然君勿笑子羽以貌失信美如客兒終
翦施摩詰我作白鬚行而得養生術

覲覲二弟作小室請書魯直名曰寄寂作此寄之
用孫子實韻

力田不逢年識者未宜閔他時歲在金百兩無虛糶士

生當自量天道平如準汝兄魯叔山正坐不前謹有琴
亦無絃何心尚求軫客來欲頽玉大白輒滿引官長既
屢罵諸生亦時輟一口吸西江玄哉居士蘊歲寒知蒼
松日暮識丹槿夢想八九椽森然羅玉筍

孫子實詩

薛宣欲吏雲季氏或招閔此分冒中秋

萬物既收稠賣藥偶知名草玄非近準才難不易得
志大略細謹士生要弘毅天地如蓋軫驥令鹽車駮
井下知綆引難甘吁爾食聊寄粲然輟誰能借前籌

還婦用束蘊吾聞調羹鼎異味及粉糧豈其供王羞
而棄會稽箒

反初

昔年淮海末邂逅安期生謂我有靈骨法當遊太清區
中緣未斷方外道難成一落世間網五十換嘉平夜參
半不寢披衣涕縱橫誓當反初服仍先謝諸彭晞髮陽
之阿舖餽太和精心將虛無合身與元氣并陟降三境
中高真相送迎琅函紀前績金蒲錫嘉名耿光洞寥廓

不借日月明故棲黃埃裏絕想空復情

精思

精思洞元化白日昇高曼俯仰凌倒景龍行速如神半
道過紫府弭節聊逡巡金牀設寶几璀璨明月珍僊者
二三子眷然骨肉親飲我霞一杯放懷暖如春遂朝玉
虛上冠劍班列真無端拜失儀放斥令自新雲霄難遽
返下土多埃塵淮南守天庖嗟我實何人

送楊康功守蘇

公於萬事輕獨嗜山水重寓直西掖垣滄洲長入夢廣
陵以都會厨酒萬斯甕每歎闕登臨持此將焉用比持
蘇臺節論鬱縉紳共翻云美泉石沆可小嬉弄忽忽治
行李草草別賓從乃知仁智心所樂異庸衆梅花發春
端百卉日興動公等行復反臺閣俟鸞鳳

偶戲

偶戲失班龍坐謫崑崙陰崑崙一何高去天無數尋嘉
禾穗盈車珠玉炯成林天飈時一拂清哀動人心一面

四百門官醮雲氣侵闕然竹使符難矣暫登臨羣仙來
按行憐我久滯淫力請始云免反室歲已深親朋喜我
來感歎或霑襟塵寰君勿悲殊勝巢嶽峯

正仲左丞生日

元氣鍾英偉東皇賦炳靈冀敷十一莢椿茂八千齡汗
血來西極搏風出北溟之無分襁褓詩禮學趨庭妙質
珠遺海高材刃發硯初更芸閣秘屢直瑣闥青史筆開
凡例論言正緯經文昌頻曳履京兆屢空囹遂總臺綱

紀常參國典刑兩宮隆眷遇諸夏聳瞻聽武略驅雷電
文鋒粲斗星乞閒辭亢滿分逸下青冥綺甲雙朱服腰
橫萬寶釘明峰春蠹蠹汝水暮泠泠散策花間徑揮屏
水上停壺觴延墨客燈燭按歌伶周袞歸公旦商巖夢
武丁久聞虛揆席佇見返皇局別數汾陽考重鐫宋父
銘巍然廟堂上永作世儀形

病犬

犬以守禦用老憊將何為踉蹌劣於行纍然抱渴饑主

人思義易乃為升斗資追隨不肯去猶若戀藩籬屠膾
意得逞烹庖在須斯糟糠固非意豚豕同一時念昔初
得寵青韉纏毯絲飼養候饑飽動止常相隨胡云不終
始委逐在衰遲犬死不足道固為主人悲

和子瞻雙石

天鏡海濱石鬱若龜毛綠信為小仇池氣象宛然足連
巖下空洞鼎張彭亨腹雙峰照清漣春眉鏡中蹙疑經
女媧鍊或入金華牧鑪燻充雲氣研滴當川瀆尤物足

移人不必珠與玉道傍初無異漢將疑虎伏支機亦何
據但出君平卜竒礪入華林傾都自追逐我願作陳那
令吼震山谷一拳既在夢二駒空所欲大士捨寶陀仙
人遺句曲惟詩落人間如傳置郵速

雷陽書事

駱越風俗殊有疾皆勿藥束帶趨祀房瞽史巫紛若絃
歌薦繭粟奴主洽觴酌呻吟殊未央更把鷄骨灼

一笛一腰鼓鳴聲甚悲涼借問此何為居人朝送殤出

郭披莽蒼磨刀向猪羊何須作佳事鬼去百無殃
舊傳日南郡野女出成羣此去尚應遠東門已如雲虫
祇託絲布相就通慇勤可憐秋胡子不遇卓文君

海康書事

白髮坐鈎黨南遷海瀕州灌園以餬口身自雜蒼頭籬
落秋暑中碧花蔓牽牛誰知把鋤人舊日東陵侯
荔子無幾何黃柑遽如許遷臣不惜日恣意移寒暑層
巢俯雲木信美非吾土草芳自有時鴨鵝何關汝

卜居近流水小巢依巖峯終日數椽間但聞鳥遺音鑪
香入幽夢海月明孤斟鷓鴣一枝足所恨非故林

培塿無松栢駕言出焉遊讀書與意會却掃可忘憂尺
蠶以時誣其信亦非求得歸良不惡未歸且淹留

粵女市無常所至輒成區一日三四遷處處售鰕魚青
裙脚不襪臭味猿與狙孰云風土惡白州生綠珠
海康臘已酉不論冬孟仲殺牛搗祭鼓城郭為沸動雖
非堯歷頌自我先人用大笑荆楚人嘉平獵雲夢

粲粲菴摩勒作湯美無有上客賦驪駒玉奩開素手那
知蒼梧野棄置同芻狗荆山玉抵鵲此事繇來久

裔土桑柘希蠶月不紡績吳綃與魯縞取具綱船客一
朝南風發家室相怵迫半賈鬻我藏倍稱還君息

一雨復一暘蒼茫颶風發怒號兼晝夜山海為顛蹶云
何大塊噫乃爾不可遏黎明衆竅虛白日麗空濶

合浦古珠池一熟胎如山試問池邊蜃云今累年間豈
無明月珍轉徙溟渤間何關二千石時至自當還

次韻曾存之嘯竹軒

翩翩曾公子子猷定前身嗜好準疇昔了然不淄磷寄
食平準官植竹當比鄰朝與竹相對暮與竹相親安可
一日無此君真可人

遊仙

服形百神朝剗心萬緣盡我無退轉境何以有精進戲
為汗漫游八極一何近渺渺東海水累累北邙墳向來
歌舞處忽復成荒村愚人如鹿耳其死了無魂孰知九

霄間玄圃枕崑崙
緇塵化人衣
蒼蘿誰與捫

雲車自天來
駕言游混茫
手持太一節
身佩使者章
龍虎傍天矯
馬龜伏以翔
朝元紫薇上
所覩浩難量
寶網結萬珠
參伍相焜煌
花品不知數
妙英折玄房
宮殿隨人身
處處輒清涼
危髻擢真玉
高謝人間粧
二、三古鬢
眉冠雲帶含
光遺我飛霞佩
副以明月璫
再拜敬服之
白毛發靈香

次韻荅張文潛病中見寄

與君涉世網所得如鈎溫念昔相乖離俯仰變寒暄把
袂安可期寄書囑加飧三年汝水濱孤懷誰與言末路
非所望聯鑣金馬門校文多豫暇玄談到羲軒孰云苓
箸小史書垂後昆匪惟以舊聞牴牾良可刊比枉病中
作筆端淮海奔亟駕問所苦兀坐一室閒晤對不知夕
歸途斗星翻平時帶十圍頗復減臂環君其專精神微
恙不足論愷悌神所勞此理真如絃

與子瞻參寥會松江得浪字

松江浩無旁垂虹跨其上漫然銜洞庭領略非一狀況
如陣平野萬馬攢穹帳離離雲抹山窅窅天粘浪烟中
漁唱起鳥外征帆颺愈知宇宙寬斗覺東南壯太史主
文盟諸豪盡詩將超搖外形檢語笑供頡頏媿娟棄追
逐撥刺亦從放獨留三百缸聊用沃軒曠

子瞻得風字

吳越溪山興未窮又扶衰病過垂虹

浮天自古東南水送客今朝西北風絕境自忘千里
遠勝遊難復五人同舟師不會流連意擬看斜陽萬

頃紅

二子緣詩老更窮人間無處吐長虹平生睡足連江
雨盡日舟行擘岸風人笑年來三黜慣天教我輩一
罇同知君欲馮長相憶更送銀盤尾鬣紅

參寥得岸字 蜿蜒跨長虹吳會稱傑觀淪連幾萬
頃放目失垠岸倒影射遙山青螺點空半從來誇震
澤勝事無昏旦破浪湧長鬢排空度飛翰肺肝入清
境劃若春冰泮安得凌九垓從公遊汗漫

欽定四庫全書

淮海集
卷四

十二

淮海集卷四

謹案卷一第七頁後四行而為高人逸才云云按東坡全集而字下有後得二字才作士

第七頁後六行泉豈知汙之按東坡全集汙作惡卷二第三頁後四行隔膝致寒暄按宋文鑑暄作

温

第四頁後八行班行昔供奉刊本昔訛皆據宋詩鈔改

卷三第三頁前三行別乘慙鄒枚刊本慙訛在據

宋詩鈔改


第三頁前七行悔無刻燭敏刊本燭訛竹據宋詩
鈔改

卷四第一頁前六行室若僧房靜刊本房訛坊據
宋詩鈔改

第八頁前五行南遷海瀕州按宋元詩會海瀕作
瀕海

第九頁前三行取具網船客刊本網訛網據宋詩

鈔改



總校官庶吉士臣張能照

校對官庶吉士臣戴聯奎

謄錄監生臣康偉

欽定四庫全書薈要

集部

淮海集卷八

五至

詳校官助教臣謝登雋



欽定四庫全書
蒼齋要卷一萬五千二百二十三

集部

淮海集卷五

宋 秦觀 撰

言古詩

觀易元吉獐猿圖歌

參天老木相樛枝
嵌空怪石銜青漪
兩猿上下一旁掛
兩猿熟視蒼蛙疑
蕭蕭叢竹山風吹
海棠杜宇相因依
下有兩獐從兩兒
花殮草齧含春嬉
易老筆精湖海推

畫意忘形形更竒解衣一掃神扶持他日自見猶嗟咨
金錢百萬酒千鴟荆南將軍欣得之老禪豪取橐為垂
白晝掩門初許窺房櫳炯炯明冬曦榛蕞羽革分毫釐
殘編未終且歸讀歲暮有閒重借披

夜坐懷莘老司諫

六合寥寥信茫昧中有日月無根柢古往今來漫不休
青髮素顏從此逝嗟子自少多遭迴氣血未衰心已艾
北渡長淮霜入屨南窺禹穴塵生袂日鑿一竅渾沌死

雖有餘風終破碎回車復路可無緣三問道人三不對
荅朱廣微

廣微才華殆天賦十歲孤山有佳句又夢東林飲虎溪
歎息清風人不悟自爾所見無金牛桐栢崑崙日傾注
葱蘢曉景破新花蹭蹬老拳擒脫兔身勤事左竟何成
巧迫化工天所怒兩鬢星星滄海頭強學禪那慰遲暮
昨夜燈花吐金粟曉烹鯉魚得尺素笑我徜徉吳楚間
經卷酒卮隨所遇人生迂意十八九月得解顏能幾度

著書準易空自疲服藥求仙良亦語此風老矣無能為
行看黃鸝語飛絮安得從君醉百場落筆珠璣不論數

送僧歸保寧

西湖環繞皆招提樓閣晦明如卧披保寧復在最佳處
水光四合無端倪車塵不來馬足斷時有海月相因依
上人弱齡已隸此心目所證惟瑰琦白玉芙蓉出清沼
天然不受緇塵擾坐客一語不入意目如明星視飛鳥
冠切雲兮佩玉難上人顧之真等閒應緣聊入人間世

興盡却歸湖上山伊余久欲窺禹穴矧今仲父官東越
行挽秋風入剡溪為君先醉西湖月

和王通叟琵琶

鶻鳩鳴時衆芳歇華堂夢斷音容絕風驚玉露不成圓
一夜芙蓉泣秋月金紋捍面紫檀槽曾抱花前送酒舫
庾郎江令費珠璧小研紅牋揮兔毫風流雲散令人瘦
忍看麴塵昏錦綬楚水悠悠更不西上天破鑑空依舊

醫者

塊然一氣初渾淪散作六物相吐吞主承客禦勝復存
是為萬物疾病原寥寥空陂遊寬魂誨此法術成軒轅
金書玉冊要不煩煥如星宿不可捫時遷聖祖遂幽昏
弊俗竊以資利源余嘗感慨期明論世無妙質孰與言
因君乞詩置屋軒聊復援筆賦本根

漫郎

元公機鑒天所高中興諸彥非其曹自呼漫郎示真率
日與聾叟為嬉遨是時敵星殞未久關輔擾擾猶弓刀

百里不聞易五穀三士空傳殺二桃心知不得載行事
俛首刻意追風騷字皆華星章對月漏洩元氣煩揮毫
綺岍春深茂花竹九疑日暮吟哀猱紅顏白骨付清醪
一官於我真鴻毛乃知達人妙如水濁清顯晦惟所遭
無時有祿亦可隱何必龕巖遠遁逃

紀夢荅劉全美

歲逢困敦斗申指辰次庚辰漏傳子夢出城闔登古原
草木榮天帶流水干夫荷鍤開久殯前有一人狀壞偉

素冠長跪烝酒穀云是劉郎自全美馬鳴車響斷還續
人境晦明秋色裏既寤茫然失所遭河轉星翻汗如洗
世傳夢凶常得吉神物戲人良有旨全美聲名海縣聞
閉久當開乃其理娟娟二十四橋月月下吹簫聊爾耳
洗眼看君先一鳴九萬扶搖從此始

和虛飄飄

虛飄飄虛飄飄風寒飄絮浪春暖履冰橋勢緩霜垂霰
聲乾葉下條雨中漚點沒流水風裏綵雲鋪遠霄虛飄

飄比時光影猶堅牢

魯直原唱 虛飄飄虛飄飄花飛不到地虹起漫成
橋入夢雲千疊遊空絲萬條蜃樓百尺聳滄海鴈字
一行書絳霄虛飄飄比人生命猶堅牢

子瞻和 虛飄飄虛飄飄盡簷珠結網銀漢鵲成橋
塵積雨梧葉霜飛風柳條露凝殘點見紅日星曳餘
光橫碧霄虛飄飄比浮名利猶堅牢

馬上口占二首

向晨結束事長途利風刮面冰在鬚
岡窮得水馬不進
霧暗失道人相呼悠悠旁舍見汲井
軋軋隔林聞輓車
游目騁懷自可樂勿憶鄉縣增煩紆

霜風稜稜萬木枯梅花破萼猶含鬚
田家往往事游獵
追逐狐兔相號呼微茫山中起狂燒
隱約林梢低日車
馬頭漸覺有佳趣勿厭阡陌多縈紆

別子瞻

人生異趣各有求
繫風捕影祇懷憂
我獨不願萬戶侯

惟願一識蘇徐州徐州英偉非人力世有高名擅區域
珠樹三株詎可攀玉海千尋真莫測一昨秋風動遠情
便憶鱸魚訪洞庭芝蘭不獨庭中秀松柏仍當雪後青
故人持節過鄉縣教以東來償所願天上麒麟昔漫聞
河東鸞鷲今纔見不將俗物擬天真北斗已南能幾人
八埒學士風標遠五馬使君恩意新黃塵冥冥日月換
中有盈虛亦何筭據龜食蛤暫相從請結後期遊汗漫
子瞻和夜光明月非所投逢年遇合百無憂將軍

百戰竟不侯伯郎一斗得涼州翹關負重君無力十
年不入紛華域故人坐上見君文謂是古人吁莫測
新詩說盡萬物情硬黃小字臨黃庭故人已去君未
到空吟河畔草青青誰為他鄉各異縣天遣君來破
吾願一聞君語識君心短李髯孫眼中見江湖放浪
久全真忽然一鳴驚倒人縱橫所值無不可知君不
怕新詩新千金敝帚那堪換我亦淹留豈長筭山中
既未決同歸我聊爾耳君其漫

淮南三歲吾何求使君到後消人憂君言有客輕公
侯扁舟相從古揚州置之匹馬恨無力千里相忘同
異域新詩空使四座驚隱居未易凡人測使君南歸
無限情鴻飛攜書墮我庭此書兼置昔年客袖中麗
句淮山青老夫強顏依府縣堆案文書本非願清談
亶亶解人頤安得座右長相見狂客吾非賀季真醉
吟君似謫仙人末契長遭少年笑白髮應慙傾蓋新
都城酒貴誰當換塵埃垢面非良筭歸來酒上正思

君莫待黃花霜爛熳

淮海集卷五

欽定四庫全書蒼齋要卷一萬五千二百二十四

集部

淮海集卷六

宋 秦觀 撰

七言古詩

和黃法曹憶建溪梅花同參寥賦

海陵參軍不枯槁醉憶梅花愁絕倒為憐一樹傍寒溪
花水多情自相惱清淚班班知有恨恨春相逢苦不早
甘心結子待君來洗雨梳風為誰好誰云廣平心似鐵

不惜珠璣與揮掃月沒參橫畫角哀暗香銷盡令人老
天分四時不相貸孤芳轉盼同衰草要須健步遠移歸
亂插繁華向晴昊

參寥詩

朔風蕭蕭方振槁雪壓茅齋欲敬倒門前

誰送一枝梅問訊山僧少病惱強將筆力為君寫麗
句已輸何遜早碧桃丹杏空自妍嚼蘂嗅香無比好
先生攜酒傍玉叢醉裏雄辭驚電掃東溪不見謫仙
人江路還逢少陵老我雖不飲為誰牽不惜山衣同

藉草要須陶令插花歸醉卧春風軼軒昊

子瞻和 西湖處士骨應槁只有此詩君壓倒東坡

先生心已灰為愛君詩被花惱多情立馬待黃昏殘
雪消遲月出早江頭千樹春欲暗竹外一枝斜更好
孤山山下醉眠處點綴裙腰紛不掃萬里春隨逐客
來十年花送佳人老去年花開我已病今年對花還
草草不如風雨卷春歸收拾餘香還畀昊

化工未識蘇羣槁先向梅花一傾倒江南無雪春瘴

生為散冰花除熱惱風清月落無人見洗粧自趣巖
鐘早惟有飛來雙白鷺玉羽瓊枝鬪清好吳山道人
心似水眼淨塵空無可掃故將妙語寄多情橫機欲
寄東坡老東坡習氣除未盡時復長篇書小草且撼
長條殮落英忍饑未擬呼穹昊

子由和 老夫毛骨日凋槁愁見米鹽惟醉倒忽傳

騷客賦寒梅感物傷春同懊惱江邊不識北風勁墻
頭知有南枝早未開素質夜光明半落清香春更好

鄰家小婦學閑媚靚粧惟有長眉掃孤芳已與飛霞
競結子仍先百花老苦遭橫笛亂飛英不見遊人醉
芳草可憐物性空自知羞作繁華助芒昊

憐君古木依岩槁西江飲醉須彌倒野花幽草亦何
為嶮語長篇空自惱萬點浮溪輒長嘆一枝過嶺誇
先早拾香不忍游塵污嚼藥更憐真味好道人遇物
心有得瓦竹相敲綠自掃誰知真妄了不妨令我至
今思理老妙明真覺昔未識但向閒窻看詩草浮雲

時起烏四飛畢竟安能亂清昊

題驢裹圖

雙瞳夾鏡權協月尾鬣蕭森澤於髮鞍銜不施韁復脫
旁無馭者氣騰越地如砥平丘隴滅天寒日暮抱饑渴
驤首號鳴思一發超軼絕塵入恍惚東門金鑄久銷歇
曹霸丹青亦云沒賴有龍眠戲揮筆眼前時見千里骨
玉臺閭闔相因依嗟爾龍媒空自奇鸞旗日行三十里
焉用逐風追電為

和東坡紅鞵帶

君不見相如容貌窮不枯卓氏耻之分百奴一朝奉旨
使笏笻駟馬赤車從萬夫仲元君平更高妙寄食耕卜
霜媚鬚兩川人物古不乏數子風流今可無參軍少年
飽經術期作侍中司御壺老披青衫更矍鑠上馬不用
兒孫扶一朝忽解印綬去耻將詩禮攘裙襦懸知百年
事已定却笑列仙形甚臞東阡北陌西風入瑞草橋邊
人叫呼相見紅圍照白髮頽然醉卧文君壚

題楊康公醉道士石

黃冠初飲何人酒，徑醉頽然不知久。
風吹花石楚山柯，藤蔓纏身蘚封口。
常隨白鶴亦飛去，但有衣冠同不朽。
異物終為賢俊得，野老田夫豈宜有。
華陰楊公香案吏，一見遂作忘年友。
日暮西垣視草歸，往往對之傾數斗。
大夢之間無定論，啟母望夫天所誘。
穀城或與子房期，西域更為陳那吼。
我疑黃冠反見玩，若此堅頑定醒否。
何當一笑凌蒼霞，顧謝主人聊舉手。

送蔡子驥用蔡子駿韻

越絕山川遠相屬萬壑千巖抱青綠卧龍一峰稱是奇
遶趾清漪如帶束鏡水春生鷓尾銜稽山日暮猿聲續
三休上與蓬萊接登眺使人遺寵辱我昔東遊觀禹穴
痛飲狂歌得所欲上天何曾有官府鸞鳳日日遭鞭扑
僧坊畫壁閱幾徧神妙難忘獨金粟華胥夢斷已十年
又見春風煮餠粥苧羅若耶固依舊可憐雲月誰追逐
故人淡泊出天性鷓鷀巢林一枝足不肯絃歌甘瓮庫

還同市門隱梅福惟應月下小叢歌尚有哀音傳舊俗
和裴仲謨放兔行

兔饑食山林兔渴飲川澤與人不瑕疵焉用苦求索天
寒草枯死見窘何太迫上有蒼鷹禍下有黃犬厄一死
無足悲所耻敗頭額敢期揮金遇倒橐無難色雖乖獵
者意頗塞仁人責兔兮兔兮聽我言月中仙子最汝憐
不如亟返月中宿休顧商巖并獄麓

南都新亭行寄王子發

洛水沄沄天上動道入隨渠下梁宋宋都堤上十二亭
一一飛驚若鸞鳳光華遠繼周王雅燕喜還歸魯侯頌
玉觴嚴令肅衣冠金縷哀音繞梁棟娟娟殘月照波翻
習習暖風吹鳥哢何處高帆落文鷁誰家駿馬嘶征鞚
柳枝芳草恨連天暮雨朝雲同昨夢借問亭名製者誰
留守王公才望重胸中雲夢吞八九日解千牛節皆中
祥符相公實曾祖庭列三槐多伯仲承明厭直出荊州
轉守此都行大用此都去天纔尺五交廣荊陽歸引控

兔園事迹化黃埃清冷文雅堪長慟舳艫銜尾車挂轄
昨日出迎今日送送故迎新無已時古往今來相戲弄
亭下嶮崎淮海客末路逢公詩酒共一樽明日難重持
豈恤官期後芒種今年氣候頗云早天矯梅花春欲縱
行見亭中祖帳開千乘送公歸法從

以蓴薑法魚糟蟹寄子瞻

鮮鮓經年漬醅醪團臍紫蟹脂填腹後春蓴茁滑於酥
先社薑芽肥勝肉鳧卵纍纍何足道飮餽盤飧亦時欲

淮南風俗事瓶罌方法相傳為旨蓄魚鱗蜃醢薦蘆豆
山藪溪毛例蒙錄輒送行庖當擊鮮澤居備禮無麋鹿
贈女冠暢師

瞳人剪水腰如束一幅烏紗裹寒玉飄然自有姑射姿
回看粉黛皆塵俗霧閣雲牕人莫窺門前車馬任東西
禮罷曉壇春日靜落紅滿地乳鷓啼

次韻黃冕仲寄題順興步雲閣

故山無期大刀頭黃塵溽暑未罷休步雲之篇忽我投

便見冰玉懸清秋順興山川甲閩甌無風萬壑松颼颼
步雲之人人品優御風禦寇真其儔仙人乘槎凌斗牛
回環十見天星周猿鶴忽驚空蕙帳周家正要礮溪望
徐得之閒軒

建安自古多俊髦徐子磊落尤其豪論兵說劍走湖海
身勤事左無所遭綠水五校已屠膾黑衣三衛嗟徒勞
歸來故山便卜築脫棄萬事輕鴻毛橫前澗水漱哀玉
傍舍老樞藏飛猱山蔬何用媿梁肉鶴髦未必輸青袍

追寒弄月有真意慎勿輕語傳兒曹

送喬希聖

鷄翔蓬蒿非所悲鵬擊風雲非所喜貴賤窮通盡偶然
回頭總是東流水我思田文昔相齊朱袍照日如雲霓
三千冠佩醉明月清歌一曲傾玻璃如今陳迹知何在
但見荒塚烟蕪迷又思原憲昔居魯門戶東西閉環堵
杖藜對客騁高談自覺胸襟輩堯禹如今寂寞已成塵
空有聲名掛千古送君去何時回世間如此令人哀我

徒駐足不可以笑指白雲歸去來

淮海集卷六